



Aqqalu C.Jerimiassen  
Atassut

UKA 2023/19  
26. September 2023

**Nioqqutissanik eqqussuineq annissuinerlu pillugit Inatsisartut inatsisaata allannortinnera pillugu Inatsisartut inatsisissaattut siunnersuut**

**(Aningaasaqarnermut, Naligiissitaanermut, Aatsitassanut, Inatsisillu Atuutsinneqarnerannut Naalakkersuisoq)**

Angallannerup allannortinneqarnera Aalborgimit Aarhusimut pisussanngoqqaallarmat, ila nunaqqatigiisugut immaqa isumalluarrassimassagunaraluaqaagut, sorphassuartigullu suna tamarmi eqaannerulersussatut takorloorlugu.

Taamaaqqajanngilarli, aatsaat taamak nassiussiniarneq akisutigaaq, aatsaat taamak nassiussiniarneq eqartigaaq. Miserrattissaavallaarunangilarlu nassiussisarnitsinni tamapajaatta misigisimassagunaripput, nassiussarsiasagut sumut tamanga kukkulluinnartumut nassiunneqarsimasut, taamaalillunilu utaqqqittariaqarneq sorphassuillu ajoraluartumik aqqusaaqqaarneqarlutik.

Soorunalumiaasiit kukkulutorluangaatsiarsimaneq akeqarmat tamanna atuisunut naggataani tutsinneqarpoq.

Ila suliffeqarfik namminersortuugaluaruni qangatsiarli akiliisinnaajunnaareeraluarpoq immaqaluunniit pisortaaneri arlallit atorfimminniit piiagaareeraluarput.

Pisortalli suliffeqarfinni pigisaanni ila ajornanngittaqaaq aningaasap pinnguaannartulluunniit atorneqarnissaa. Oqaluttuarisaanermummi ilaanissaaq takusareerparput, Puisi A/S-imi pisoq pinnguarnarit ilarpassuat inuiaqatigiit akileraartartut naggataani akiligassariligaanaasiit.

Royal Arctic Line piffissami sivitsortumi ilumut nunatsinni naammaginartumik sullissinersoq apeqquserneqartaqisoq tusartuarterparput.

Taamatuttaarlu assartuinermi suliffissaqartitsiniutitut atugaanera qiviarneqartariaqarluni, tassami nioqqutissat nassiunneqartut uteqattaajaaruteqqaarlugit nuussuteqattaqqaarlugillu apuunnneqartartut takuneqarsinnaalersimammat, toqqaannaq sumunnarfissaanut periuseq atunngilluinnarlugu.

Maannalu uani siunertami takuneqarsinnaavoq, allaffissornerulernermik kinguneqartussaammat una siunertaq, qinnuteqaateqartunngooq qaavatigut kr.250-inik akiliisalertussanngortut, ila Naalakkersuisut siulittaasuata oqalugiaataani tusagatsinnit allaanerugaluassusia, tassami allaffissornerup apparsarneqarnissaa tassani siunertaasoq tusarluarnartuunikuugaluarimat. Sapaatip akunnera ataaserluunniit qaangiutinngitsoq, allaffissornerusoqalissammanngooq akiliutissaq taaneqaratarpoq.



Atagu taanna eqqarsartaaseq illikaallalaarsinnaannginnerparput? Immaqamiuna nunatta frihavnitaarnissaa namminerminik utaqqeqaarsimasussaagaluaripput, aatsaallu tamanna pereeriarpat Aalborgimi Grønlandshavn qimallugu.

Tusartuartsimaqisarpummi nunatsinnut qanoq iluaqutaatigiumaarnera, ila immaq pitsanngummik ataatsimilluunniit taakusaqarunanngilagut ulloq manna tikillugu.

Malittaaanillu Eimskip ilaaqutereernerata kingorna, aatsaallimi ilumut tamassumunnga immaq Naalakkersuisut namminneerlutik nalunaarusiorsinnaagaluarput, qanoq inuiaqatigiinnut nunarpullu tamaat assartuinikkut eqquusuinikkullu sunniuteqarsimanerata pitsaaqutaanik ajoqutaanillu.

Taamaattoq una takoqqaarusunnarpoq qanoq ataatsimiititaliap nalilissaneraa, Atassummiillu naalaaqqaalaarusuppugut, naak siunertamut nangaanartoqartitsisinnaagaluarluta.

Taamatut oqaaseqarluta siunnersuut Aningaasaqarnermut Akileraartarnermullu ataatsimiitsitaliamut innersuupparput.